



Infurmaziuns impurtantas davart la determinaziun dal spazi d'auas

Tge è il spazi d'auas e pertge vegn el determinà?

Il spazi d'auas serva a segirar il spazi per garantir las funcziuns natiralas da las auas, la protecziun cunter aua gronda e l'utilisaziun da las auas (art. 36a LPAuas). Il spazi d'auas da las auas currentas è in corridor d'ina tscherta ladezza che cumpiglia l'aua currenta sezza, il sec-tur da la riva ed en tscherts cas er ils conturns. Per auas stagnantas cumpiglia il spazi d'auas l'aua sezza ed ina strivla d'almain 15 meters mesirà davent da la riva (art. 41b OPAuas). Per auas currentas cun ina ladezza natirala dal fund dal letg da fin 15 meters prescriba l'art. 41a OPAuas che la ladezza dal spazi d'auas dependia directamain da la ladezza natirala dal fund dal letg. Per auas currentas cun ina ladezza natirala dal fund dal letg da passa 15 meters (flums gronds) ha il chantun proponì ina ladezza minimala dal spazi d'auas. Quella na re-sguarda dentant anc betg ils interess da la protecziun cunter aua gronda u ils interess per revitalisaziuns da las auas.

Tge restricziuns existan en il spazi d'auas

L'art. 41c OPAuas regla l'utilisaziun admissibla dal spazi d'auas, tenor la quala na dastgan vegnir mess nagins ladims e meds per proteger las plantas en il spazi d'auas. In'utilisaziun agricula è admissibla, sche quella vegn fatga tenor las pretensiuns da l'ordinaziun davart ils pajaments directs sco surfatscha da dispersiun, sco saiv viva, sco bostgam e chagliom per lung da las rivas, sco prà duvrà en moda extensiva, sco pastgira duvrada en moda extensiva u sco pastgira da gaud. Ils cultivaturs da surfatschas extensivas en il spazi d'auas vegnan indemnissads per las prestaziuns da tgira tenor l'ordinaziun davart ils pajaments directs. Per quest intent ston las surfatschas vegnir integradas en il contract da cultivaziun.

La construcziun da novs edifizis e stabiliments n'è betg pli pussaivla en il spazi d'auas, cun excepziun da stabiliments liads al lieu e d'in interess public sco vias e sendas da viandar, im-plants electricas da flum u punts (art. 41c OPAuas). En territoris surbajegiads fermamain po l'autorità permetter excepziuns per stabiliments confurms a la zona, sche nagins interess predominants na s'opponan a quai. Stabiliments construids legalmain che pon vegnir du-vrads conform a lur destinaziun èn da princip protegids en lur situaziun sco tala (art. 41c OPAuas).

Termins

Conform a las disposiziuns transitoricas tar la midada da la OPAuas dals 4 da matg 2011 de-terminescha il chantun il spazi d'auas tenor ils art. 41a e 41b OPAuas fin la fin da l'onn 2018. Fin a la determinaziun definitiva dals spazis d'auas en la planisaziun d'utilisaziun valan las distanzas sin ina strivla d'omaduas varts da las auas tenor las disposiziuns transitoricas tar la midada da la OPAuas dals 4 da matg 2011. Questas distanzas èn oravant tut tar auas pitschnas pli grondas che tenor la determinaziun definitiva. Quai ha ina influenza directa sin las pussaivladads d'utilisaziun (architectonicas). Per crear la segirezza giuridica e la segirez-za da planisaziun e per pudair remplazzar las disposiziuns transitoricas restrictivas tar auas pli pitschnas, recumonda il chantun a las vischnancas da determinar ils spazis d'auas uschè

svelt sco pussaivel, il pli tard dentant fin l'onn 2018. Als biros da planisaziun ch'èn activs en il Grischun metta noss uffizi a disposiziun ils documents necessaris.

Cumpetenzas

Il chantun sto procurar ch'il spazi d'auas vegnia resguardà en la planisaziun directiva ed en la planisaziun d'utilisaziun (art. 36a LPAuas). Perquai che la OPAuas na prescriba betg quant lad ch'il spazi d'auas sto vegnir calculà per flums gronds cun ina ladezza natirala dal fund dal letg da passa 15 meters, ston ils chantuns far quai. Il chantun Grischun è sa decidì da preschentar quest spazi d'auas en ina charta da basa e da metter a disposiziun quella sco basa a las vischnancas per la determinaziun definitiva. La determinaziun definitiva dals spazis d'auas tenor parcelas vegn alura fatga da las vischnancas en il rom d'ina revisiun da la planisaziun d'utilisaziun. En questa procedura è garantids ils dretgs da cundecisiun da las personas pertutgadas. Ultra da quai pon vegnir applitgadas ed utilisadas las libertads d'agir legalas ch'èn dadas en emprima lingia en in territori ch'è surbajegià fermamain.

Chaussas generalas davart la determinaziun dal spazi d'auas per ils flums gronds

Per ch'il spazi d'auas satisfetschia a las pretensiuns da l'art. 36a LPAuas, sto el sa cumponer da la ladezza natirala dal fund dal letg e d'in sector da la riva sufficient dad omaduas varts dal flum. Per calcular la ladezza necessaria dal sector da la riva resguarda la OPAuas la curva-clav etablida (mussavia "Hochwasserschutz an Fliessgewässern", UFAEG, 2001, model directiv "Fliessgewässer Schweiz. Für eine nachhaltige Gewässerpolitik", UFAGC/ UFAEG [ed.], UFAG, ARE 2003). Tenor questa curva-clav importa la ladezza minimala dal sector da la riva almain 5 meters tar auals pitschens (pli stretgs che 2 meters). Per auas currentas cun ina ladezza natirala dal fund dal letg tranter 2 e 15 meters s'augmenta la ladezza da la riva, tenor la curva-clav, da 5 meters a maximalmain 15 meters.

Per auas currentas cun ina ladezza natirala dal fund dal letg da passa 15 meters (flums gronds) ston ils chantuns determinar il spazi d'auas en il cas singul. En concordanza cun la curva-clav prevesa il chantun Grischun dad er betg engrondir ils secturs d'omaduas varts da la riva en cas da flums pli gronds. Independentamain da la ladezza natirala dal fund dal letg restan tals secturs sin ina valur statica da mintgamai 15 meters. Perquai che questa metoda n'augmenta betg pli las ladezzas da las strivlas a la riva dals flums gronds cun ina ladezza natirala dal fund dal letg da passa 15 meters, tira ella gia a niz tut la libertad d'agir areguard ladezzas dal spazi d'auas uschè pitschnas sco pussaivel.

Il spazi d'auas minimal preschentà en las chartas sa referescha mintgamai ad in traject da l'aua relativamain lung e vesavel sin la charta. Sco ladezza dal spazi d'auas per in tal traject è represchentada sin la charta adina la ladezza natirala mesauna dal fund dal letg plus 30 meters (= 2 giadas la strivla da la riva da 15 meters). Sch'ins sutdivida in traject prescrit dal chantun, po il spazi d'auas esser senza auter pli pitschen en secturs cun ina pendenza pli gronda. Perquai ch'i sa tracta d'in spazi d'auas mesaun, poi dentant er dar ch'il spazi d'auas è in zic pli grond sin tscherts trajects, sch'ins sutdivida quel pli detagliadamain. Ina sutdivisiun pli fina premetta dentant observaziuns detagliadas e po vegnir fatga da las vischnancas cur ch'il spazi d'auas vegn realisà en la planisaziun d'utilisaziun. Ils spazis d'auas minimals dals flums gronds, ch'èn preschentads sin las chartas, cuvran ca. 60 hectaras surfatschas cun culturas alternantas, quai ch'è stgars 1 % da las surfatschas cun culturas alternantas en il chantun Grischun.

Ultra da quai èsi d'observar ch'il spazi d'auas prescrit na resguarda betg ils interess da la protecziun cunter aua gronda. Quai deriva dal fatg che la determinaziun exacta da las zonas da privel per il process "aua" è reducida en blers cas sin il territori d'abitadi u ch'il chantun na posseda betg datas digitalisadas che avessan pudì vegnir consultadas per elavurar la charta qua avant maun. Cur ch'il spazi d'auas vegn determinà per l'emprima giada en la planisaziun

d'utilisaziun u a chaschun da las revisiuns successivas da la planisaziun d'utilisaziun ch'èn da far pervia d'enzonaziuns, ston las chartas da privel vegnir resguardadas u elavuradas da nov, sch'ellas n'èn betg gia avant maun, e quai en cas ch'ils cunfins dal spazi previs per revitalisaziuns u la distanza da las auas vegnan tangads tenor las disposiziuns transitoricas.

Libertads d'agir da la vischnanca cun determinar ils spazis d'auas en in territori ch'è surbajegià fermamain

Sin las chartas consegnadas èn ils spazis d'auas represchentads en il territori da construcziun en color rosa. Cur ch'ils spazis d'auas vegnan determinads definitivamain da la vischnanca pon els vegnir adattads a las relaziuns architectonicas dal territori ch'è surbajegià fermamain (definiziun cf. feigl d'infurmaziun dal UFAM "Gewässerraum im Siedlungsgebiet" dals 18 da schaner 2013), sche la protecziun cunter aua gronda ed il mantegniment da las auas èn garantids (art. 41a OPAuas). Ina distanza minimala da las auas da 5 meters per garantir il mantegniment da las auas na duess betg vegnir sutpassada.

Libertads d'agir da la vischnanca cun determinar ils spazis d'auas ordaifer in territori ch'è surbajegià fermamain

Sin las chartas èn inditgads ils spazis d'auas ordaifer il territori da construcziun sco corridor blau. Cuntrari a la situaziun en il territori ch'è surbajegià fermamain na prevesa la LPAuas nagina pussaivladad per diminuir il spazi d'auas ordaifer il territori ch'è surbajegià fermamain. Sin la charta elavurada dal chantun datti mo la pussaivladad menziunada qua survart da sutdividir pli detagliadamain ils trajects d'aua prescrits.

Sin las chartas è il spazi d'auas vegnì determinà da princip simmetricamain, q.v.d. egualmain sin omaduas varts. Cun determinar il spazi d'auas en la planisaziun d'utilisaziun han las vischnancas la pussaivladad da spustar sut tschertas circumstanzas lateralmain il spazi d'auas. In spustament vegn dentant mo en dumonda, sche las relaziuns topograficas natiralas permettan quai u sch'i n'ha nagins edifizis u stabiliments entaifer il spazi d'auas spustà. Sche duas vischnancas vegnan separadas tras in'aua currenta, po vegnir fatg in spustament mo en enclegientscha vicendaivla. Plinavant ston las vischnancas observar ch'il spazi d'auas sto vegnir spustà lateralmain il mument ch'el vegn determinà en la planisaziun d'utilisaziun, sche las relaziuns topograficas natiralas pretendan quai.